

**DISCOURS DE TEODOR AUBANEL  
PRESIDENT DI JO FLOURAU TENGU EN AVIGNOUN  
PER LOU CENTENARI CINQUEN DE FRANCES PETRARCO  
(18-19-20 de Juliet 1874)**

**SEGUI DOU RAPORT DE FELIS GRAS  
Secretàri dóu Counsistòri**

MIDAMO E MESSIES,

Es pas sènso ferni que, davans aquéu palais aro véuse de sis oste, davans aquéli toure merletado, aquéli paret tant fieramen auto e toujours superbo, emai lou tèms achini lis embrèque de sa daio; es pas sènso èstre bravamen esmougu que, sus aquesto vasto plaço, aro que la voues di papo, di rèi, dis empeire, s'es amoussado emé la glòri e la poumpo dóu passat, vène iéu, ciéutadin d'Avignoun e felibre prouvençau, vous parla d'un pouèto que la Prouvèncò ispirè, que trevavo nosto vilo, noste Rose, nosto Sorgo, i'a cinq cènts an d'acò, vous parla de Francés Petrarco.

Anés pas crèire que vous fague soun istòri! Quau noun la counèis? Demandas à-n-un pescadou de L'Ilo o de Vau-cluso, à-n-un ràfi de Cabriero, à-n-un pastre de Venasco:

— Quau èro aquéu Petrarco?

Vous respoundran:

— Ero lou calignaire de Lauro.

Touto l'istòri de Petrarco e touto sa glòri soun dins soun amour pèr Lauro, amour caste e fidèu, arderous, sèns soulas, que de-longo s'aflamo e barbèlo enterin que Lauro viéu, e se lagno e se despoutèto quand la mort i'a raubado.

Lou divèndre sant de l'an 1327, au mes d'abriéu, à sièis ouro de matin, madamo Lauro sourtié de la capello di mourgo de Santo-Claro. Petrarco, en mai d'un rode de sis obro, baio éu-meme aquésti entresigne, li met dins si sounet, lis escriéu sus lou pergamin d'un Vergéli de l'Ambrosiano; coume pèr un evenimen di plus grand de l'istòri, a vougu que tóuti fuguèsson assavènta dóu jour, de l'ouro que vai l'enfada pèr la vido.

Lauro, aquéu matin, pourtavo uno longo raubo verdo semenado de vióuleto; si péu d'or mescla de perlo jougavon au vènt gregàli: aurias di de rai de soulèu e de plour d'eigagno. En davalant lis escalié de la capello, si bèus iue rescountrèron aquéli de Petrarco, e atuvèron dins lou cor dóu jouvènt l'ardènto cremesoun dóu pouèto e de l'amaire.

Alor, coume dis, intrè dins lou laberinte que n'a ges de sourtido: